




欽定四庫全書

則堂集卷一

制

浙西判官具越可水部郎中制

宋 家鉉翁



勅多士之世副臺郎之選者前代謂之賢乃知三署之

屬例無輕授某官高越早踐朝序嘗為史臣當官有聲

聚學不倦頃屬上將出臨大藩輟參入幕之資備觀理

劇之用府罷赴闕時名蓋高司川之秩俾從真授無忘

職業以荷朝恩

記

中齋記

學問之道貴乎擇中而已矣孔門四科七十子皆升堂入室之士夫子獨許顏子以擇乎中庸是知中之未易擇也嗚呼中之未發本一理也及其發而達之于用則一理散見於萬殊萬殊之中莫不各具一理隨時而見也隨事而在也隨地而各不同也在斯時則斯為中至

他時則斯不為中矣在斯事則斯為中至他事則斯不為中矣在斯地則斯為中去斯地而之他所則斯不為中而為偏矣苟非擇之精辨之審豈能隨時而應之適事而節之隨所過而折衷之動與中會而無毫釐之爽乎是故學問之道擇中為難聖賢教人使之博學審問慎思明辨以窮盡天下事物之理理窮知致則事物過乎吾前如短長之就度輕重之適權衡皆有自然之則萬雖殊而知非中之所在也此所謂理一而用殊

用雖殊而理未嘗不一是之謂中。沁水高濟卿篤學而好修端勁而溫裕佐相府政譽藹然榜其齋曰中俾余為之記之余語之曰律令之中余不能知也義理之中余嘗學焉中有定體而無定用其用之無定者固其體之所存然不可執定體而求之也子講磨有素每持經訓以為臨事之準的車轍所行裁處無滯見識明允余復何以為告然嘗觀孟子論楊墨之為我兼愛而曰子莫執中為近之執中無權猶執一也夫子莫之執

中蓋知審擇乎過與不及之間者也而孟子于其間又發出中與權之義而曰執中無權猶執一也奧哉權乎舜執兩端而用中權也中庸之時中亦權也執一而無權為其滯乎一而六能周乎萬也濟卿所居之官審刑之官也人有麗乎重者子欲輕之輕之誠是然必酌其情之輕重而權以處之則中在是矣人有麗乎輕者或欲重之重之固非然必為誤為故而權以處之則中在是矣夫權非中外之物也乃中之權也擇之精辨

之審而後知權之所在推之他事達之他官取之左右
逢其原可也此余所謂皇之中輒書以為贈

雲齋記

士有抱負奇偉不求為世用猶典教一方以其道私淑
諸人者是雖仕也而實隱也是雖隱也與潛深伏奧獨
善其身者異矣河間張彥舉早負鄉曲鄉盛名以鄉國公
選教授六州十年于茲安恬不競余所謂仕而隱隱而
能以其道私淑諸人者也彥舉以雲名齋俾余為之記

論之曰雲一也瑞乎天者為慶雲澤乎物者為油雲

栖遲巖竇偃薄林壑不能為瑞為澤者則閑雲也子取

其為瑞者乎抑取其為澤者乎抑慕其栖巖偃壑適

適而忘情于斯者乎昔者禹臯稷契並處堯朝蔚乎

其輝炳乎其容衣被下士人莫名其功此雲之瑞乎天
者也伊起于莘說奮于巖其君用之其類應之膚寸而

升不終朝而雨乎八紘之澤乎物者也乃若荷蓀
耦耕之倫以放曠為高處不違其望行不越其鄉羞幣

聘而傲王公則岫雲之無心者也吾子學孔孟之學誦詩讀書考古訂今方將一於世彼隱君子遊世之事不足為子言也然則雲以名齋義何居乎張子曰嘻吾敢志古人之志乎蓋雲者雨之根也學問者事業所從來也高山大澤其包納也厚其涵蓄也久故氣之升乎天者氤氳郁紛澤乎土者霖霖霏霏是豈一日之積乎士君子之學亦猶是耳吾典教六州士之從吾遊者數百人其渴于聞道若旱苗之望滋吾懼乎無以雨之

年兀兀唯日孜孜亦欲厚吾之所蓄庶以有霑漑吾

徒云爾子不觀諸易乎雲雷而為屯雷雨而為解屯之

雲雷其蓄諸中乎解之雷雨其蓄諸外者乎子知屯

之必能為解知雲之必能為雨則知吾命齋之意矣乃

若臯稷伊傅之事業關乎天而制于命吾知彼何哉子

其毋以為問余聞君言為之歌曰山之高兮雲之涵兮

澤之大兮雲所納兮子之居宮環堵兮道所存兮充

子之學道彌大施彌博兮雲兮雲兮其孰窺子之際兮

遂書以為記

雪庵記

余蜀人也蜀之西有雪山烏崔嵬萬尋皓爽高潔貫冬夏而不改余愛之仰之暇日必升高以望當其喜而
未歸山與余心俱明當其靜而斂歲山與余心俱肅或
憂愁縈紆觀山而萬慮俱澄或事物膠轄見山而萬紛
俱寂余每慨然嘆曰山乎雪乎其餘之良朋畏友乎何
一典刑法度參前倚衡動與余會乎山中有隱君子年

九十一日造余言曰子之愛雪乃至是乎雖然子見
之以目而未能喻之于心也見其粗而未見其精也雪
中有易子知之乎余曰未也隱者曰子歸而求之於易
三月是讀易數十遍粗見大意猶未有以貫而通之也
中年讀禮至經解篇子曰潔靜精微易之教也乃廢卷
而作曰雪中之易其在是乎夫無極而太極易之所從
來也方其冲漠無朕不可見也窺不可以聲臭測一
而不二純而不雜謂之潔靜豈不然乎迨夫兩儀既分

四象既立乾坤索而成六子三畫動而為六畫方以類
 聚而天地水火風雷山澤各居其方物以羣分而八重
 卦互相為索而成六十有四衍而至於千萬推而極之
 毫髮天下之至微而至精孰有加於此者乎譬之雪為
 道而眺之高下散殊一日千里即而玩之飛者為六出
 墜者為粒繁而不紊密而不洎其寓物而成_形也方中
 乎矩圓中乎規小成其小大成其大千態萬狀自然天
 心其精也不離乎潔其潔也所以為精雪乎易乎是可

但而淺窺之乎余始居西_英之下自以為有得於雪及
 聞隱者之言返而求之於易然後知潔靜之中有精微
 之蘊不在乎境而在乎吾之此心也嗟夫心內也境外
 之心境混融而後有一見道之全體得之於目而不能
 喻之于心未免見其粗而遺其精也彼隱君子其知道
 者乎漳川郭長卿令名實踐士論共推分教高陽余始
 得定交聆其話言挹其容色窺覘其文字之溫雅知其
 涵養克積厥有自刺長卿以雪名庵_庵俾余為之記余惟

學者之于雪與騷翁詞人異騷翁詞人玩物而逐于物
 烏能知雪學者以心悟雪以雪洗心內外契合以成其
 為德非徒一篇一詠留連光景而自以為有得于雪也
 長卿粹于學易而以雪命庵契雪于心者也意其宮庭
 屋漏造次顛沛無斯須不在乎是其有得於雪者乎故
 余以昔之得於易者而從君質馬願長卿有以告之匪
 敢言記

見山亭記

余周遊半天下見山多矣晚歲羈寓古瀛乃在燕齊趙
 之間其地平曠衍沃環數百里無高山大阜可登覽以
 自壯里人病之繪山於屏疊山於庭以寄其願見山而
 不可得之情余過而見之語之曰子誠好山然好其似
 而未知其真也夫真知山者不求山於山也繪者之于
 繪疊者之于疊皆以象而求山象之外有真意焉彼豈
 能知之乎知山之真者其惟吾徒乎王君虞卿鄉之老
 學宿儒授徒三十年坐下冠者常以百數平居以

主敬自持訓飭學徒惟在一敬喜愠不外形動作有常則鄉黨歸重人無異詞余亦幸託友焉一日聞君作亭向西榜曰見山亟往訪而觀之坐定跂而望重城巋然其下屋瓦參差無所覩也余問虞卿子之山安在為我_才亦其處虞卿若然大笑曰是中安得有山吾所見者非山之山也吾晨興坐于斯亭招諸生來前誦詩讀書講易說禮各業其業各吐所疑各炫所長有會于余心_心為之喜如好山升乎楣梁修巘_墮墮乎几格余每應接

不能暇也諸生退賓朋來集踵相接於斯亭談經者吾

答以經綸_論事者吾答以事自性命道德以至耕稼陶漁

靡不畢陳會於余心余為之喜如巖崖豁開_岡阜起伏

之狀其狀為吾之有吾受之而不能既也至如元夫偉

人長_冠高冠下車而入振袂而升典型森羅法度具設

則山之岱嵩廬衡一朝盡在目圍吾不出戶庭而觀天

下之大觀是皆吾非山之山也彼騷翁詞人流連風景

嘯傲林壑放意茂林脩竹之表適情雲山煙水之外一

觴一詠自以為知山皆逐物而遷者於山果何見乎余
 聞君言知君所見與世俗異為之擊節賞嘆然念君求
 山於人曷若求山于我乎求山于我求之吾此一心焉
 耳天高地下山峙川流日月照臨風霆鼓舞何莫非道
 骨之流行何莫非心體之妙見學者以心會道境之過
 乎吾前皆心也心之會乎境者皆道也道非心外物境
 非道外物皆學道君子操存涵養中事耳昔夫子登東
 山而小魯登泰山而小天下道非在東山泰山也道在

聖人之身因東山泰山之高可以見道體之大吾今與
 君共登斯亭瀛之四境盡在目中又何以登他山為哉

秀野亭記

行之陽多大山巨野士有志當世者仕而達則其設
 施見於時仕而不達則隱是山之中往往擇其地之勝
 處作屋而居之以為游息之所王君字某讀書積學官
 游半世仕不至大官退于太行下築室置圃而居焉浩
 然自得不知老之將至也其子誠甫追述先志鋤治其

荒蕪興修其僵廢仍榜之曰秀野介友人求余為之作
記庶幾先業不墜於地余嘉其志但未嘗身到其處不
知野之所以得名客有游乎太行者為余具道其詳曰
是野也四時不同而其景各異方春萬花俱紅萬草俱
綠桃不言而成蹊杏不粉粉而成色千彙萬狀爭獻其芳
春之秀也夏及華者漸實茁者漸茂菡萏盈乎沼汀蒼
菑噴乎巖崖巖槐障乎山萍拖乎水清風徐來萬暑皆却
百之秀也已而幽蘭在畹佳菊在徑則楚澤陶園之所

有此皆有之至於稻梁黍稷盈乎其野莫非秀也少焉
雪積於岡冰起於崖松挺特而愈高栢槎枒而愈壯其
下老梅百本修竹千竿如幽人節士相與為朋友其景
又與三時不同矣若夫有臺臺有亭有樹有居則又
士君子樂其樂者秀其秀者也此則有不容盡言者當
問乎其人乃能知之余曰子言善矣吾所謂秀則異乎
是人生乎宇宙之內秉五行之秀而為五常之性孟子
所謂惻隱羞慙辭讓是非者皆其秀之端也士所以為

士者此其秀也故三代之上其選_選用人才有俊士造士
 秀士其名不同士脩之於野而秀其秀者達而秀於朝
 廷之上而野之為秀又不足言矣此蓋_蓋以在我本然之
 秀而為天下秀吾意王君所以遺其子孫者乃是之秀
 也誠甫恪承先志謹守詩書之傳異時必以己之秀而
 為時之秀其設施又未可量也古語曰煌煌靈芝一年
 三秀誠甫其勉之

道山堂記

瀛之四郊皆平原廣野地勢趨於下惟城西一隅坡陀
 隱隆_隆據風氣之要會友人趙器_器之別墅在焉西山橫陳
 於前崔嵬卓立如偉人元夫峩冠_冠垂紳傲岬萬物之表
 其傍崗阜聯屬_屬又如經生學士聚弁共談下視丘垤終
 不與為伍而山之面勢直乎吾墅情若相得者主人以
 暇日領客縱觀_觀墅有堂有亭前此皆未為之扁客請以
 見山名堂以仰高名左亭覽雲名右亭庶補墅中之闕
 主人曰嘻名則善矣然近舍吾瀛遠取他山以為之名

可乎吾聞海上三神瀛洲居其一吾土之山亦以瀛名
是可得而知其故歟洞山叟進曰通天地間一氣耳厥
初判極輕清者歸於天重濁者附於地而重濁之中亦
有輕清者焉則蓬萊方丈瀛洲之屬在人間世而出乎
人間世者皆是也列子書謂方蓬嶠輿根無所著與潮
波俱上下可以去東海而流西極佛徒亦謂西竺有山
飛而附于南海之東至今猶存是其說雖若荒怪然竊
意天地之始陰陽之初風氣凝而未固此容或有之至

人以道眼而觀知其為瀛命之曰瀛其散見于九州之
壤不知幾蓬幾方幾瀛惟有道者識之他人有不能識
也嗟夫山非高也水非深也而清氣所鍾歷萬古如一
日此吾瀛之所以為貴乎若人之慕三神者乘桴御風
求之數萬里外而不可得則曰弱水阻乎其前也風引
吾帆望三神而不可得至也孰知瀛在人境吾里于是
吾居于是泮渙優游日與瀛俱豈非不出戶庭而觀宇
內之奇勝者乎客慕乎其外而為之名不知主人在此

而不在彼也于是扁堂曰道山名墅曰瀛圃堂乎圃乎
 非吾之固有而誰當有之乎或勸謂余曰主人方將有用
 于世子期之以遊世放曠之事不亦隘乎余曰非是之
 謂也山以道名著其高也圃以瀛名著其清也學道君
 子志乎高願卑者之同乎其高也居乎清願濁者之同
 乎其清也而豈遊世放曠之謂哉主人好樂詩書涵泳
 義理澹然泊然遠榮利而弗即知其志之所存居之所
 在是名也斯為稱乃書為記

道山書堂記

客或論余曰子昔歲壽主人賦西園嗣歲又賦瀛圃皆
 馳騫神仙方外之說以興乎景所以為壽也今茲主人
 作堂百堵將聚同里後進而學焉子乃扁之曰道山書
 堂得非指海上三神而為之名乎三神者道家山也子
 以是名主人讀書處吾不知子之道為何道而為山何
 山也試為我言之僕曰唯唯子言是也夫道一而已矣
 由開國而來至於今幾千萬年帝王聖賢所公共者此

道一也道之外豈有他道乎迨至七雄之散邪說並興
 加以嬴秦大道遂汨人有目老氏為道家者道而以家
 名蓋私之也而况海上之山有無荒忽誰能致詰方士
 謬言神仙居之因亦名之曰道家山山而以道家名蓋
 亦私之以為我有於道果何關乎余前賦西園賦瀛圃
 聊為寓言耳今扁是塾而曰道山書堂則吾道中之山
 也夫豈外求於無何有之鄉乎嗟夫莫大者道也莫高
 者山也大矣高矣而終不離乎平地此吾之所謂道山

也在易乾坤三交而為艮艮之象為山一陽居上高而
 有立性乾以為之性也二陰在下厚而可久性坤以為
 之性也高而有立厚而可久夫是以為止止其所止而
 不離乎平地斯止也蓋大學之止于至善艮所以為山
 也自艮再變而為大畜山居上天在下聖人于其象而
 曰天在山中大畜此以著心體之大包納無間也夫天
 之高大而蘊乎山中以至微而蘊至大象人之此心虛
 靈瑩徹為善畢備於天下義理無所不該然非學問存

養有以擴而充之則其大者不能為大故聖人于其象
 而曰天在山中大畜君子以多識前言往行以畜其德
 是蓋聖賢窮理之學也理窮性盡而天下萬物皆融會
 於此一心則良道所以成也彼為老氏之學者謂方蓬
 嶠輿根無所著與潮波上下可以去東海而流西極是
 其為山虛幻渺茫無所依據道其道山其山而非吾之
 所謂道山也器之主人高明而靜厚和裕而肅恪無慕
 乎其外晝而躬播西郊不憚勤苦夜而篝燈讀書治己

分事率至夜分乃寐嘗與余共讀程氏遺書至頤彌無

須

體芥子無量廢卷慨然曰彼既空之吾又從而無之其
 非聖人天在山中之旨乎吾以是知器之胷次所存過
 人遠甚故於茲塾之成發明此義因以為之名蓋佛氏
 之須彌老氏之三神同一幻妄頤之聖人之易斷之乎
 其不可同日語矣夫子嘗曰仁者樂山仁者靜仁者壽
 蓋仁則必靜靜則樂在山是以知其必壽器之仁者也
 靜者也自壽千歲有不待祝處而為雍參出而為伊傅

皆仁者靜者之能事吾于器之有望遂書此為記

一樂堂記

人之生也負陰抱陽鍾五行之秀莫不各有自然之樂是其根諸性初與生俱生者也是樂也在中之樂發而為情情與樂俱遷則情蕩而樂肆欲勝而理亡矣故情在富貴則為富貴所遷以鳴玉曳履華轂朱輪而為樂情在功名則為功名所遷以抵掌鳴劍被堅擊強而為樂情在辨說則以鼓輔搖唇敷陳利害而為樂情在辭

章則以絺章繪句鋪張藻麗而為樂是其為樂逐情而遷非夫性分中之樂矣辟之水為源乎崑崙出乎積石順而導之以趣於海汪洋混涵其來無窮是則水之性也猶人之樂自源徂流一本乎初純而無雜者也乃若潢汙之水激之過顛綆之在山或決而東或決而西皆力所為非水之性也是烏足為樂昔者洙泗之上夫子亟言樂皆道內之樂也門人大弟子心領神會由是而有得於道者多矣至孟子論三樂以父母俱存兄弟無

故而為計此是八倫天理相親相愛不假外求其樂在
 中而言也一而不二純而不雜夫是之謂一樂今太常
 中山田公正卿天下士也秉義立道正身齊家自處家
 庭行乎鄉里以至立乎朝廷之上動皆如則二親具慶
 年過七旬而力行不倦正卿與其二弟養志承顏溫清
 定省必躬必親余嘗聞前輩士老垂訓後學每以求顏
 子所樂者何事為問喫緊為人無過乎此今正卿以一
 樂名堂余請問之曰父母俱存兄弟無故其樂安在正

卿曰噫事其事則樂其樂矣厥父菑厥子播播父之厥菑
 匪懈益勤久而安焉則在中之樂也伯氏吹塤仲氏吹
 箎和兄之塤久而融焉則性分內之樂也嘗過庭服膺
 詩禮之訓退而與諸弟紬繹其旨未有能達者從而請
 焉焉父為師兄弟為友以是講學以是立身以是酬酢事
 物求有得焉是樂其之所在也余曰子之樂孝弟中之
 樂曾閔之樂也夫所謂樂求曾閔所樂何事而已請書
 以為記

傳清堂記

天秉陽位乎上而其清氣流行於宇宙間鍾而為賢人君子剛方直大不與世變相為推移者清氣之所鍾也斯人也出而見用於世發為議論著為事業屹底柱於中流會百川而注滄海世道每恃之以升降者一清之所為也然亦有出而見用於世乃與姦邪小人對峙而並立君子之勢常不勝乎小人則陰濁有以間吾之陽明而其清者不得直遂焉耳三代而下惟兩漢多君子

而東漢君子所立視西尤偉閔西夫子楊公則善類之宗而人物之領袖宇宙清氣之所鍾也自時厥後眾君子如杜喬李固陳蕃范滂繼踵而作皆能以世道自任公實為之倡公之風高矣然而仕不遇明時秉法立道於羣儉眾闇之間不克大展布以歿此有識之士所為慨嘆而公清節著於當時清名垂於後代如三辰五緯之麗天芒寒色正千載如一日是其清之終不可泯者也余周游海內每見公之裔孫宦游所至莫不恪守先

訓以四知不其居也晚歲在瀛乃與路知事楊君君寶適相邂逅問其家世則閩西夫子之胄也其遠祖居於保州之梁門中原全盛時嘗為邊帥以威惠著聞其後徙居東城立四知祠於所居之奧將以勉勵子孫俾知家世之所從來也君寶之高祖擢進士第為萊陽令曾祖為萊陽丞廼祖繼登撫仕值時多難棄官膠水之北率子孫躬耕以自贍險德避難者也君寶之先人後回萊城舊宅居止膠與萊聚指七百中更亂離轉徙不意獲

全君寶嫡長孫也自念祖先積德深厚故其傳世久而弗替求余為之名堂且為記以昭先烈余惟閩西夫子位三公子孫蔬食徒步或勸之開產為後嗣計公曰使後世稱為清白吏子孫所以遺之者豈不厚乎至於今幾世幾傳而其裔孫猶知以一清自勵惟其有之是以似之豈不信哉謹名君之堂曰傳清而為之記余願君寶書太尉傳於四知祠之壁俾子孫朝夕見之仕者謹於官箴居者謹於家法老者以是勉其後生長者以是

率其童孺洞洞于屬屬乎克謹而四知之畏克而至于中庸謹獨之地夫然後有光祖德而一清之氣脈流暢而無窮矣

品堂記

昔之評畫者以吳道子為神品上上王摩詰為妙品上上夫造於妙矣入於神矣其品復在上之上藝至是曠千載而獨立可也今二子之畫流落人間時或見之其精之至而造於妙者猶可求之筆畫之間其妙之至而

入于神者非筆畫形象之所可求蓋妙猶可識妙而入于神有未易識耳東坡翁在鳳翔有曰道子實雄放浩如海濤翻當其下手風雨快筆所未到意已吞又曰吳生雖妙絕猶以畫手論摩詰得之於象外有如仙翻謝籠樊其末又云吾觀二子皆奇俊又于維也歛衽無間言味詩意似以摩詰優于道子與畫品所評異矣然皆賞其妙而不及其所以神豈妙而入於神有未易言歟余周遊海內所識國工老手多矣精妙絕人往往多見

之有如神品上之上聞之矣而未之見也晚歲來瀛乃
識相臺韓京叔昂臣兄弟魏國忠獻公之諸孫也燕趙
間推善繪必曰瀛海之二韓扣其門求其畫者踵相_接
也鄉黨前輩老成人每_謂余曰韓氏兄弟畫入神品子
無以尋常眼法而觀也嘗為大長老雪苑師作觀音地
藏二相每焚香展玩光彩鬱勃出乎頂間漸大滿一室
中苑公寶而藏之不輕以示人比其歿畫為有心者取
去余雖未及見之聞在他所而尤奇異鄉老成人所言

不誣也余嘗從容以問昂臣乃曰人以吾畫為有神吾
初不知其神如何也但昔嘗聞之師以為畫者心之精
神得之心應之手不可以外求也故吾黨畫時閉戶靜
存畫是人則想其人之容色其動作言語想之得然後
像之以為像夫是以能得其真乃如繪天人相則想其
清淨玄虛高出萬物之表繪浮屠氏在定相則想其湛
寂內守神采蘊於不露繪浮屠氏應物相則想其莊嚴
具足光輝發而_見皆積精以赴之運智以成之畫雖

成于吾手吾不能神其所為其神者出於自然吾有不能知也余聞其言作而曰人以子之畫為神子不能知其神是子畫之所以幾於神也勉之哉摩詰道子不足多遜乃書品堂二字以遺之

近古堂記

余周遊半天下入其里觀其風俗淳厚人有士君子之行問之必古哲人上賢講學故處典型漸漬有日來矣歲戊寅自燕徙瀛三閱寒暑與其里人遊縱觀其俗尚

所異尊老貴德崇儉尚讓而好學其俗然也歲正月父老夙戒里中子弟少長咸集乃推其父祖行者俾坐中席相與羅拜於前既又推其兄行者俾坐右席復相與羅拜于左拜已奉觴為壽更勸酬莫不盡敬長者不嫌其為傲少者不以為卑屈有古者鄉飲之遺意焉父兄為集召賓友子弟姪甥列立執事奉豆觴進俎几行爵上饌奔走後先不參以僮隸有古者小學洒掃進退之遺節焉其為士音隆師而重道聞儒先生止於是就

而訪之以道得正一言一行誦說記憶久弗忘也其為
 民者勤儉節用衣不紃綺食不重味有酒食異饌必奉
 以進於老者退與一家蔬食以為常凡皆近古之彛則
 隨事而見者余心敬之未知其所以然也暇日考訂乃
 知漢大儒毛公嘗為河間獻王博士葬于郡西三十里
 高冢猶存而屬邑廣川董子之里千有餘年詩書氣脈
 郁乎未艾賢者道化感人之深有若此者余欲為之記
 之而未皇也儻去三徒徒自城之南歷西而東所至皆有

學塾授徒多者百餘人少者不下數十絃誦相聞藹然
 有古者鄉庠黨塾之遺意王君國賢所居近古則東
 塾也學校之廢六七年而郡人猶能各以其力興城
 闕之久廢謂非善教之所覃可乎昔東坡公為眉山郡
 治記興作有及于鄉俗近古者三至今海內之人目眉
 山為三近古州今是拜禮讓之俗近古之風遽教之不
 能悉其可使之佚而無傳乎乃書此為之記自今塾由
 而庠由庠而泮頓復承平之舊將使海內之人目吾瀛

金定四庫全書 卷一
為近古州顧不美歟爾令長君子鉅宗達人共勉旃無
墜兩先生詩書之澤

養志堂記

傳曰在心為志志者心之所之而未形於言者也孟子
論曾子之孝而曰事親若曾子可謂養志者也夫當此
心之動而有萌發而未形見于事是為志之始發而君
子之事親乃能先意承志盡所以養志之道是豈有他
哉亦積誠而已矣蓋曾子之者志根乎誠者也誠積於中

敬致乎養己之心即親之心己之志即親之志故能先
意而孚隨隨事盡分而無一毫之慊是皆學問中事也是
故中庸言反身而誠然後能盡順親之道大哉誠乎其
曾子養志之所先乎真谷陳君覃懷人早歲避地來瀛
因家焉窮經學古編交當世偉人嘗佐一二大府幕治
聲藹然浸階通顯而乃安恬不競歸卧里閭尋泉石之
樂曾次抱負固有大過人者曾未得展其設施也家嗣
子新負經世之才修誠身之學溫恭有守端肅寡言其

學淵源端可識也此歲總府奉詔貢士子新蔚居選首
 六論歸重無異辭調官中都迎致二親安輿就養作堂
 三間俾余為之名余扁其堂曰養志子新復求余為發
 其義余以京都文物之藪辭不敢當既又念來瀛一紀
 定交君父子間見其居家持身處鄉動由矩則猶有中
 原盛時道學君子之典刑故不克終辭而書以復之曰
 養志之事不特在晨昏定省與夫起居食頃之間必也
 以誠合誠以志承志乃能盡其致養之道吾子新實允

蹈之余嘗觀真谷好施子新輔其親以施優貧恤孤敬
 老字幼周人之急如己之急無所吝真谷好禮子新輔
 其親以禮吉凶慶吊之事講於鄉曲施於親舊舊巨細靡
 遺各中其度不見其有情容矜色也真谷篤於交游之
 誼所居又臨燕齊大道士大夫過者無不來見子新竭
 力承接送往迎來惟親意之所欲為家非有餘力非克
 裕而天性嗜善激義與其親同之是皆人之所難而子
 新行之不以為難余是以知其誠存乎致養非特余知

之是邦前輩老成咸嘉嘆不已於言莫不曰子新事親庶幾乎養志者乎然余猶願有言焉昔者曾氏父子並登聖人之門三子言志而曾點獨舍瑟從容有志於暮春浴沂詠歸之樂夫子與之蓋三子志乎事功曾點獨志乎道此所以見取於聖門其後曾子造詣既深優入聖域遂膺聖道一貫之傳人以為自舍瑟中來曾點志乎道曾子亦志乎道此曾子養志之大者真谷家世輩懷地近洛中志濂伊之學有年于茲子新之學即真谷之學子新之志即谷真之志願以聖道自期勉進乎中心如心之域是誠養志之大者子新其力行之

自貴堂記

自貴有二貴己之貴而無慕乎外學者事也貴己之貴而無志於世隱者事也無慕乎外可也無志於世則亦隱而已矣二五儲精人得其秀而最靈是以貴乎物然天能與人以此貴而不能使人皆知自貴知自貴者其必由學乎中庸之尊德性尊此者也孟子謂八人有貴

於己貴此者也此學者貴己之貴而加以學問存養之功所以全其天也人固貴乎物而士君子復有學以自貴其道夫然後在我重者而不為外誘所移窮而獨善其身此貴也達而得行其道亦此貴也處畎畝在朝廷素富貴素貧賤無入而不自得者知自貴者也若夫荷蓀長沮接輿之倫傲世放曠自高其道彼自以為貴非聖門之所貴也長蘆高君正臣年盛氣老天資粹明學問不倦視榮進漠如也嘗采邵子歌詩以道自貴者而扁

其居室其立志可謂加於人一等矣然愚也竊願有論焉蓋邵子之自貴即孟子之良貴而亞聖大賢出處殊致學作者不得不辨也孟子以仁義忠信為天爵公卿大夫為人爵所以致嚴夫內外重輕之辨而孟子輒環天下應聘列國初未嘗以道自高遂恣然忘情於斯世也非仁義不談非堯舜不陳合則爾否則去孟子所以自貴其道者益在此而邵子生當太平盛世君明臣良朝闕闕政獨高尚其事者其志以為時可無仕焉耳孟子

志伊尹之志邵子樂顏子之樂一出一處惟義所在余
所於正臣亦欲其有用於世豈謂其遂可以隱乎蓋天
者理也帝王盛時命曰天命祿曰天祿職曰天職臯夔
稷契登庸在朝伊傅周召左右厥辟何莫非天之所命
何莫非己之所貴初豈有所謂人爵者與天爵對峙而
並行降而春秋戰國王制大壞聖賢無位以行其道而
世祿之卿辨詭縱橫之士刑名律家刀筆賤賤微寵狹
貴人慾以肆天理消亡孟子不得已而致辨乎此曰如

是而為天爵如是而為人爵又曰仁天之尊爵又曰仁
則榮不仁則辱皆所以遏人慾之橫流扶天理於未墜
復又為之言曰古之人修其天爵而人爵從之蓋貴已
之貴無慕乎外者士君子之常守而有此德必在此位
者亦事理之當然時止而止時行而行本然之貴固自
若也豈必高逝遠引而後能全其貴乎雖然自貴之自
其義甚大聖賢每亟言焉夫子於乾而曰自強不息於
晉而曰自昭明德書曰日作元命詩曰自求多福皆使

人反求諸已而自之於心不諉其自於人不奇其自於命夷險殊途而自之為自確乎其不可移也是又自貴之目正臣聞余言請書以為記遂為之書

隱求室記

今羈寓古瀛劉惠父書來陳誼甚偉其言曰西漢之季眾君子皆隱揚子雲獨仕東晉之季士大夫皆仕陶靖節獨隱吾不能効子雲頗慕為靖節語書室曰隱求將以求吾志為耳願為我發其義余得書瞿然曰惠父

立志如此加人一等矣然念聖賢出處隱見惟義所在隱之所志即達之所行志之所存乃適之所在故曰隱居以求其^志行義以達其道伊之處莘呂之在渭隱也而志在天下荷蓑耦耕楚狂接輿亦隱也而志止於其自是雖所志不同亦由其分量有淺深故其推^賢有廣狹^狹譬諸萬斛之舟艤乎荒陂膠乎野澤而三江五湖皆其力量之所及有不行行斯達矣乃若剡木為舢舨桐為楫可以泛滄浪涉溱洧而不能乘長風破萬里浪其

所負挾者淺也然則士君子所志何志志乎道也志乎
道者志乎學者也由致知格物正心修身推而致之以
至齊家治國志此者也學此者也積功於幾微毫忽之
間存誠於戒謹恐懼之際必使在我者根基固實標本
正大夫然後涉世故而不為事物所亂可隱可見惟義
所安故君子非隱之為難隱而能求其志之為難也惠
父溫裕而雅正侍梅溪翁曰以講學為事介然有立恬
然不競余敬愛之每期之以遠故樂以聖賢學問行事

為惠父告或曰如子所言將使惠父隱以求志耶抑使
惠父仕以行其志耶曰亦欲惠甫志其所志而已矣遯
九五嘉遯貞吉象曰嘉遯之吉以正志也遯之正志與
論語隱居求志其立義固各有所在然居遯而能正其
志者必隱居而能求其志者也遯之為卦二陰浸長得
位而居內四陽遯乎外君子退而窮處之象也九五一
爻居中履二為衆陽所宗陰雖盛而不能干其志正也
外物之誘不能入則學力充而操守固何行而非道遯

欽定四庫全書
卷一
之至善者也。因子漆雕有焉，併以是復之。惠父。

欽定四庫全書

則堂集卷二

記

肅堂記

余如瀛，僦居中城，隣於種德李氏。獲與志遠及其弟茂實為文字友。余敬之愛之，恨相得之晚。里人或語余曰：子未識其父兄耳。識其父兄，則知淵源所漸。厥有自來。久而種德翁簿正高，湯蒲考來歸舜臣，亦自肅寧。

至今乃得升老子之堂徧六羣從典刑法度炳乎日輝
或以文采著或以政事稱皆端靜而內守篤學而好修
信鄉譽之不虛得也肅寧壯邑也介燕趙之間民物繁
阜風氣雜糅自昔以為難治或勸無往君慨然曰邑以
肅名吾平日僖用一肅字當以吾之肅肅彼之未肅奚
難治之有乃隨事而整葺之邑庠久廢衿佩散而之四
方文風索然君首以興學為務也
誦之音盈耳人知講學之方
丁字漸復舊章絃
定其政之肅而文

也五方游惰之人怙威羣行積為田里之害君震之以
不怒馴之以有禮強梗率服入其境相戒無犯是其政
之肅而和也健險好勝之氓持吏短長以為訟端敗俗
傷化莫此最甚君臨之以莊鎮之以靜伸其鬱滯而平
其險阻莫不革心向善俯首從化舊習為之不變是政
之肅而有紀也在官六七年乃獲授代以去邦人為之
立碑頌德以為前之宰是邑者幾人久而肅肅而成如
君全美實所鮮儷余昔扁君之堂曰肅以昭其賢也君

欲記之以發揚其義乃重告之曰夫肅之為肅乃聖賢學問中之事非世俗尚威嚴以為肅也肅之此心肅之此身心正而身修肅之本也其本既正然後推以達之於事未正而未舉聖賢學問之肅也三代而下為政者尚防禁設章程以求人之肅此吏治之肅非學問中事君子有不貴也易之文言曰直其正也方其義也又曰君子敬以直內義以方外敬義立而德不孤文言之敬直即學問之道所以肅乎其內者也文言之外方即吾

內肅所以達之於事而無不肅者也大率主敬以為之肅則心正身修而內自肅也未有中無所主而能內肅者也未有內之既直而外之不能方者也文言之直方貫本末該內外而為言也余觀舜臣父子兄弟所以修之家庭者而知其平日用工在內所主在敬也惟其所主在敬故其達之於外者無往而不肅君令贊貳淮安以其施之一邑者而施之一州廉譽著聞士論歸重無異辭此敬直之效驗隨地而著者也由是而擴充在我

金定四庫全書
卷二
之工夫無有間斷則其肅之於外者將日異而月不同
豈止一邑一州而已哉舜臣其勉之

敬室記

朱張二先生倡道東南共扶千載之隆緒志同而道合
相得而彌章者也而武夷之傳至于今百有餘年門人
高弟皆能尊聞行知以其得於師者復畀於後今再三
傳莫不曰我朱門之的派噫其盛矣余獨恨南軒先生
無恙時士之登門受業者袂聯踵接而吾蜀人互鄉闕

黨之執經隅坐視他邦為尤衆中更蜀亂衣冠散落南
土或以文學顯或以科舉政事奮莫有泝其學問源脈
之所從來而以廣漢之道自鳴于當世者雖時使之然
而從遊之士亦不為無責也宇文氏再世從先生嘗在
大弟子之列淳祐間子敬始自蜀來輯其先世所聞於
先生者求訂證於庸齋趙公之門庸齋深器許之為之
大書以表其傳且曰南軒之道在子其勉之哉自是以
來子敬欽承一綫之緒為學愈篤用志愈專而縉紳士

大夫所以期之者亦莫不在是會余以國事久羈於北
子敬書來孳孳問辨不以患難零落而廢其講習之功
且屬余為書敬室二字曰此南軒先生所以遺吾祖者
中燬於火願為我更書之余辭不敢僭然宇文氏之得
于南軒者在此一敬亦吾徒所當共講也乃述舊所聞
書而復之蓋人所以中天地而立者此一心也心所以
主宰此身而裁制萬事者此一敬也操之而存存之以
此敬也治之而治治之以此敬也養之而無害克而致

之以造乎至誠無息之地大率始終乎此敬夫敬豈自
外至者哉人生而靜敬之原也是故君子之學貴乎主
靜主靜者主乎一者也主一無適適夫是以為敬中庸戒
慎不覩恐懼不聞敬之在中而未發者也迨夫喜怒哀
樂之既發則散見於外者何莫非此敬之流行出門如
見大賓使民如承大祭皆戒慎恐懼之所積而慎獨之
功也敬雖隨事而在所以為敬則本乎其中先生以敬
加室亦欲人謹之於宮庭屋漏之間耳嗟夫世淪俗敗

予治之傳不遺其後而子敬獨能泝其父祖學問所從來恪守毋墜求之衰俗殆不多見余願子敬心廼祖之心學而軒之學以是自名其家以是私淑諸人益行其傳於後使廣漢之派與武夷並傳顧不偉歟乃書為敬室記

李氏敬聚堂記

三代而上以宗法聯合族屬親親之恩雖百世不渝也宗法壞於秦義聚興於漢義聚者古宗法之遺意絕無

而僅見是故君子貴之善乎先正范公之言曰吾宗黨自始祖而下諸父昆弟猶子穉孫常數十百人自吾之身而言雖有戚疎遠近之不同然皆吾先祖一體之所分也夫以一體之所分而癢疴疾痛不相知聞貧富貴賤莫相收恤是豈吾祖先垂澤裕後之意哉乃立義莊聚族而居之至今二百餘年范氏裔孫猶列居文正坊中義規炳然海內視以為則余昔嘗寓跡於吳暮而效之宗黨散落四方集之不能會每以自憊晚歲來瀛邦

人心老為余言吾城中李氏鄉之義門也自其高祖脫身亂離拮据卒瘁始營居室遺命子孫聚廬合爨母得他徙厥祖厥考率而行之迨至惠甫弟兄復從而推廣之聚指日蕃家政益治儉勤均節內外無間言蓋義居者五世矣余聞而善之一日造焉主人延客坐堂上弟子姪左右列待撰杖奉几各以其職童子勝衣以上拜跪皆能如節余為之感嘆不能已噫嘻此中原舊俗毛公董子道化之所及於今不多見是當有褒表前此闕

焉今總管僕散公開鎮是邦崇尚風化大書張公藝事以示旌獎李氏榮之揭之西南特室求余扁其堂且為之記之將以傳示子孫期毋負賢牧表揚之意余於鄉黨美善固喜聞而樂道之李氏復以此為請其庸無書余惟公藝朴謹人也平居非有學問講習之益乃能恪承祖訓以一忍字聯合族屬是可尚矣然忍之為義見之經傳所以節止喜怒之過乎中者喜之過則流怒之過則厲家人嗚嗚怒之厲也婦子嘻嘻喜之流也節而

止之徐而正之夫是之謂忍非含蓄不發以是為忍也
父父子子兄兄弟弟夫夫婦婦人之大倫所以行之者
一敬而已矣長者敬身以率其下少者敬事而從其長
和而肅順而則相與共由於禮教之內始於忍終於無
所用其忍而家道成矣吾觀於李氏一門雍睦整飭相
觀而善惠甫弟兄復能協贊其長招延師儒以暇日講
說經義吉凶祭賓考於禮而後動是知敬矣傳曰敬德
之聚也請名斯堂曰敬聚因書此以為記

直齋記

夫易天地自然之易也歷四聖成書至夫子而後集其
大成一易之外無他易也漢末有揚子雲者著太玄始
僭聖擬經而為之玄至衛之平又從而為之包其後率
皆得一數成一書皆僭其號為易後人以其新奇而學
之而天地自然之易隱矣是故易可學也而僭聖之書
不必學矣學僭聖之書則四聖人之易愈不明矣此予
平日之論也晚歲來瀛平生舊交皆遠閉戶讀易而

已既而趙君敬叔自燕而歸朝夕相從惟談周易不及
其他予問之曰世人皆好擬聖之書子何為不該之敬
叔曰吾惟知有易而已他未暇學也予開其言歛衽歛
嘆曰子可謂善學者矣僭聖人之書不接於目則聖人
之易始著於心自是與敬叔論易一日敬叔語余曰吾
以直名齋子為我發其義余曰直之字義見於經者多
矣未知敬叔所以名齋之意何所本敬叔曰吾嘗讀易
至坤之六二直方大不習无不利以為聖人之學實在

於此朝夕思之以為學問之大經吾之名齋取是而已
余作而對曰善乎子之讀易也此余平日所得於易者
而敬叔乃與余同夫直方而大乃聖賢傳心之要也本
之吾心根諸天分此直此方也著之德行達之事為此
直此方也自東而西自南而北以至上下內外左右前
後何往非直何行非方惟直惟方是以為大斯乃天然
一定之理與帝典執中中庸時中其義相須彼言中推
之一家之中一國之中天下之中莫不皆然此言直言

方推一國一家以及天下之大亦莫不然此直方所以
大也聖人之用易也以吾心本然之直自然之方而律
天下萬事萬物之理推而致之何往而非直何行而非
方此直方之所以為大也以其出乎至公本乎自然非
智巧安排所可及是以云不習无不利非窮理之深有
見於道者未易語之以此然敬叔以敬為字以直名齋
合敬與直而其義乃備夫敬主乎一者也不貳以二不
參以三乃所以為敬文言曰敬以直內義以方外敬義

立而德不孤此聖人教人以敬而求直所以直其內也
由是而推之則義立而德方矣大學絜矩之道所惡於
上毋以使下所惡於下毋以事上所惡於前毋以先後
所惡於後無以從前所惡於左毋以交於右所惡於右
毋以交於左大學所謂絜矩即坤六二敬以直內之所
推也知夫子敬以直內之意即知大學絜矩之方所以
合乎義也知大易之直方即知大學之絜矩主敬直內
守義方外相須以成也知敬義相須即知直方所以為

大也吾與敬叔相處久而知其為人洞洞屬屬惟敬惟畏語不妄發發必中節行不妄動動必皆謹周游四方所與交游者皆當世名士確而信守而篤直能以敬而直其內者也由是而推之何行而不方乎惟直惟方所以必至於大真善易者也至於命著求卦必按乎義理而為之說不與時而俱遷故動中於禮不爽於義其平日用功專在持敬以行乎義吾觀其立心制行應事接物未有違乎敬者而其所得大率本之坤六二一爻非善讀易不能也世之學者篤意於僭聖人書至於聖人之經往往忽焉予每病乎是故於敬叔所學深有取焉敬乎敬乎其直方之所以為大乎乃書以復之

節齋記

易於渙之後而受之以節節者所以正天下之渙而納之於至善之地也粵自天高地下萬物散殊盈乎宇宙之間者莫不皆有自然之節至衆而至一也至不齊而莫不皆止於齊也由其有自然之節而聖人因之以為

節故凡天下之渙者皆至於節而止日星運乎天渙也而有常度寒暑行乎地渙也而有常經在人則君臣父子之倫日用常行之道所以止仁止敬止孝止慈各止其止而不得過者皆其自然之節也士君子學問之道存養之功亦貴乎知所節知所止而已矣傳君夢臣中原望族世有爵邑於朝而夢臣以儒名家嗜學不倦中年莫居河間則以岐黃之道教授於其里扁所居曰節齋其用志固已過人遠矣余惟盤古三聖人為天地立

心既創制立法以冒天下之道復為生民立命而醫之教興焉其事雖不同而所以為節則無不同也子不觀乎渙與節之二象乎風行水上為渙風固動物而水與之俱風行而不留水逝而莫之止猶情感於物而動與物俱遷者也是故聖人受渙以節見水澤之義焉盈虛之不常者水也止節之有定者澤也義理之節情猶水之節乎澤止其所而不得過也是乃學問之道而醫之理存焉渙其受病之源節其制病之藥而甘節苦節云

者則參芝瞑眩隨所施各得其當者今吾與子目視而耳聽手持而足行所以固其肌膚之會筋骸之束者此節也而形命於氣氣為形寒暑晦明蝕乎其外吉凶夏患感乎其前神放而馳氣暴而弗斂則疾疢之所從生也而醫經之節易經之節乃有相似者溫涼以劑其燥濕補瀉以制其盈虧窒者通之痺者砭之逸者收之疾之來無窮而吾之節無所不盡是固醫術而學問之道存焉若秦和陳六氣序五節以告晉平公且曰君不節不時能無及乎夫所謂節惟其時也若醫和者其有得於用易之時者乎是故上醫明理引經以斷疾中醫明方引古以斷疾夢臣以節名齋庶幾上醫之明理者乎若夫以己之節而節人之未節以我之治而治彼之未治夢臣方將有用於世克而擴之具為節也又有在於醫之外者矣

拙齋記

昔者洙泗之上四科七十子聰睿明辨孰非當世之英

才而子曾子獨以天資一魯受知聖人其後造詣既深
優入聖域獨承道統千載之緒傳之子思孟子流行盛
大至於無窮皆自前日一魯中來也余始至北方問中
州道脈所託今有人乎縉紳諸公交誦魯齋許公之賢
且曰篤實內守學為曾子者也余未及往見而自燕徙
瀛許公亦告老而歸旋聞下世每用此為恨厥或告余
曰繼許公而作者拙齋劉公仲寬其人也余時欲見之
而劉公適以使事來瀛乃得相識聽其言論觀其風致

藹然道學氣象而用拙名齋與許公所以為魯心法實
有相似者余喟然嘆曰繼魯翁而作者捨拙翁而誰歸
乎道之源脈其在斯乎大魯之與拙非容色之外見者
也根諸天稟之自然加以學問之日益義精理明純一
無雜故能以道自任譬之廣谷易川地力深厚種之無
不上生之無不長大茂盛以其植本深厚故其發達悠
遠彼淺中弱植倏盈而疾萎者夫豈任重道遠器哉而
况拙之字義與巧為對者也夫子嘗有云巧言令色鮮

矣仁又曰剛毅木訥近仁於一巧一拙之間有仁不仁公與私義與利之辨聖人之慮後世深矣有人於此簧其辭責其容飾乎其外以求人之悅已斯人也所為雖未至流蕩而忘返而志之所之常驚於外則人慾之分數視天理為勝去道之遠從可知矣復有人焉剛且毅不為苟容木且訥不事速售中有所主外無少斯人也縱未能全體皆仁而心之所存常務乎內則天理之分數視人慾為勝謂之近仁豈不信乎蓋天稟之厚者

為朴為純由是而加之以審問慎思益之以明辨篤行若繪事之後素其施功也有地其進德也有本何往而不為仁乎而人偽之滋者為巧為詐巧而亂德巧而作恭口給之禦便佞之友如張錦帆飾桂棹而涉滄溟萬里之險何行而可濟乎是故聖人示人以求仁之方常有取於確鈍而深戒乎巧令亟言之不一言之為是故也君早以才名自奮而務內踐實不為表暴俗尚文君則斂華而就質俗尚術君則韜光而內守覃精義理之

書篤志性命之蘊其靜而正其純而直忱確內充德隅外著然猶以拙自命則君之謙也而亦君實行內充自得而自信者也君年踰耳順二親具慶而旨甘之奉溫清之節早暮必躬猶慙然自以為未足扁其堂曰取足此又君實行之著於家庭者也孟子論曾子之養志而曰事親若曾子可也可之為言僅可而不自以為足此曾子所以大過人者拙齋務內踐實亦學為曾子者也曾子之學仁也曾子之孝曾子所以成其仁也學問之

道由明善而誠身悅親以至信乎友及獲乎上得乎民體用兼該有諸中必達於外窮而在下則任斯道之託達而居上則任世道之託莫不自務內踐實中來吾於拙齋有望焉書此為記以見余區區期望之意云

尊教堂記

陸象山先生近世大儒也嘗有云東方有聖人生焉此心同也此理同也西方有聖人生焉此心同也此理同也數千百載之上有聖人生焉此心同也此理同也數

千百載之下有聖人生焉此心同也此理同也語出人
或謂象山兼取二氏之學余曰不然此心此理四方上
下實無不同豈惟聖人同之智愚賢不肖得諸天而有
諸己莫不皆同但聖人先得我心之所同然者耳是故
聖人因心以明道因道以立教道在天地間一而已矣
教在天地間亦一而已矣自羲農黃帝迄于唐虞商周
之盛此一道也此一教也由中邦達于四外極于八表
日月所照霜露所墜此一道也此一教也聞域中有四

大者矣而未聞教之有三也至西漢初年有為黃老之
言者暨晉宋齊梁魏隋而西竺之教行乎中國雖並驅
相先各尚其所尚然其即心以明道因道以立教謂人
性無有不善人皆可以學至于聖賢與吾聖人所以立
教有相似者象山翁所謂此心之同此理之同以是故
爾余昔在里中鄉人有立祠象設吾聖人與老子瞿曇
而參事之者榜之曰三教聖人之祠余語之曰教可三
乎教可三道亦可三乎盍扁之曰尊教庶幾合異為同

則其三者可會而歸于一也衆皆曰然晚歲至瀛間任
丘范君字某所居當南北大道儒先生與黃冠緇侶過
其門者莫不延入禮遇盡敬余聞而異之已而求見具
道所以然之故曰吾于三聖人之道敬之如一故于三
聖人之經與三聖人之徒禮遇致敬亦惟一吾嘗治堂
奉九經居中左佛書右老子道德經諸子百氏列之兩
傍客有知道者延入于斯就而訪之以道冀有得焉余
聞君言重用嘉歎嗟夫如君者志于求道是以庸敬在
道視世俗之人尊崇異教以徼求福利者不可同日語
矣乃書尊教二字以扁其堂復為之說

思義齋記

思義齋者鯨川李氏所以垂訓於其子孫也李氏祖子
孫三世相承無他兄弟至思義君乃有三子皆業儒通
經行誼著于其里思義君每為之戒曰吾根孤獨傳於
今三世每懼弗克負荷汝兄弟壯大鼎立自今子孫繩
繩足以勝祖先門戶之託然吾欲爾曹之聚而相依不

欲爾曹之析而相遠也夫人所以族居林立於宇宙之內孝友睦婣交相愛者以有義存焉耳義者天理之自然人心之固有義存則由祖暨孫至于永世一本而衆支也譬之松柏生乎高岡枝葉扶疎上干霄漢自本自根一而已矣是以昔之鉅賢偉人聚族而處名曰義聚為之田曰義庄為之居曰義宅此屋而處共爨而食揭為義規祭祀婚嫁慶弔吉凶交相收恤百世如一日也吾以思義名齋欲汝曹之思乎義而常相保也其嗣長

卿率其仲李恪遵遺訓扁思義于中堂介友人求余為之記之余聞其言敬其意而不敢拒也昔者洙泗之上格言昭垂而有九思之目始之以視聽貌言之思終之以見得思義思至于九聖門所以垂訓者備矣李氏所以名齋其義有所在然思而必在義其于義利之辨可謂知所決擇矣夫見得思義非事至而後為之思也蓋心者一身之主宰而思則心之精神所以酬酢事物而使之各中其度而不忒者也聖賢學問之功惟思為謹

操而常存此思也定而能應此思也惟其用功篤志思之在我者一而不二純而不雜先有以主宰乎其內故事至物來各就吾之條理而無爽爽於義本之正而末之隨也天理在是外物紛至無由而入故思不在于得而在于義是其謹思之功也他日子路論成人而曰見利思義子張論士之為士而曰見得思義夫以子路之堅強子張之明辨而其用功特在乎此則知九思之目以思義為終聖門高弟猶或難之學者可不致謹于是乎

鯨浦居川陸之會帆檣夜馳輪蹄晝奔莫不逐逐於榮利之徒窮者思通蟄者思奮未得者期于得而長卿兄弟端靖自守澹然無營恪遵先訓以垂裕于後其曾次所存可以想見推其思義之功何行而非義乎故吾樂以孔門垂訓與子路子張所以決擇於義利之辯而為君告尚勉之哉

時思堂記

曲沃許氏中州望族也孝弟之行著於鄉閭由祖仲玉

翁至其孫君祥三世同一心法前輩名人嘗為扁其堂
曰時思搢紳大夫士為之記為之贊為之銘及詩篇成
一巨軸亦以示余俾繼題其後余惟時思之義美矣况
祖傳之子子傳之孫百年相承如一日是蓋人之所難
其可不為之書乎然念人子之事親有終身之養有歿
身之思文正之事王李曾子之養曾哲行之有常守之
不懈此聖賢所以盡道而垂法于後世者也武王率文
王之已行不敢少替而曾元之事曾子乃不其然是知

祖子孫三世一心以事親為事之本在古猶難况於今
乎故余謂能盡終身之養者乃能致歿身之思許氏祖
暨孫所以奉養其親者見於諸賢之記銘詩頌稱贊無
異辭則其孝敬之實有以大信服於人矣而又能推其
平日奉養之心而為歿身追遠之心即晨昏定省之勤
而致其春秋烝嘗之思禮與哀俱至而無遺憾斯豈非
人之所甚難乎愚讀禮內則篇見聖人教人以養親之
事子事父母雞鳴而起各服其服各事其事躬掃灑問

起居職饋醢治滄瀝一日之內斯須之頃思存乎事事無所不在所謂終身之養也又嘗讀祭蓋篇而見聖人教人以歿身之思霜露既降則有悽慘之心雨露既濡則有怵惕之心至其祭也思其笑語思其志意思其所樂思其所嗜思之所存即孝敬之所存是之謂歿身之思必能盡終身之養而後能致其歿身之思將之以禮敬行之以哀慕如親之在此堂所以致歿身之思也余願君祥書內則於居處之室書祭義於饗祀之堂使世子孫當養而升斯堂覩內則之教而思所以養當祭而升斯堂覩祭義之教而思所以祭則孝敬之心油然而生子暨孫至於曾玄傳心法於無窮矣若乃顯親揚名之事不在乎他在於貴己之貴而已修其人爵以道自貴己貴而親亦顯是謂孝子慈孫之能事君祥其勉之哉

節孝堂記

歐陽文忠公作五代史有取於王凝妻李氏守節事所

以扶世道於既墜愧當時之為臣者也五季馮道歷相
四朝身事七姓偷生苟全至其將終猶著長樂老叙自
矜為榮孟子所謂無羞惡之心非人者其道之謂歟是
故君子之秉史筆者於守節之婦為之立傳記姓名俾
其志節有傳於後人苟知王凝妻之為賢則於馮道之
偷生苟全唾棄而不顧矣道晚歲得封於瀛邦猶有指
其生平游歷之處相與言曰是瀛王舊遊之地余每懼
其污染後人壞亂風俗屢因碑碣間懇懇見意欲人之

知慕乎古毋羨乎馮蓋為世道慮與歐公五代史為節
婦立傳同意非健言也借國子安為余言吾里於瀛南之
交河習俗篤厚好禮義夫節婦比世間見無慕於馮也
里中有張得山之母楊氏早喪夫父母欲奪而嫁之誓
志弗聽家貧子幼舅姑垂白在堂楊氏躬井臼之勞治
耕織之事旨甘不廢溫清如節厥後舅姑歿竭力喪祭舅
皆能稱禮斯烈丈夫所難而楊氏乃能行之由少暨老
四五十年子壯而後其憂乃釋族黨父兄共高其行名

其所居堂曰節孝謂其守節而能孝求余為之記之余
羈客也辭不敢當居數月子安再從邑里來致鄉黨之
請益勤余又念瀛為馮道封食之壤其一時貴盛疑足
以移人而是邦是邑婦之義子之孝臣之忠比世而間
見是因人心秉彝之常不待教之率之而自趨於善者
而亦可見漢獻王毛公董子詩書道化所及至於今而
未艾也是其可無書乃題此下方以待作史者採焉

積慶堂記

坤之文言曰積善之家必餘慶先儒為之說曰善以
積言父祖修之身存之心者是也慶以餘言父祖積諸
此身此心所遺子孫者也積之者源也積而成慶自源
徂流非由外至者也其積者深且厚則其成流大以遠
如長江巨河發源乎岷峨積石會百川衆流東注滄海
其流無盡由其源之來無窮也是故仁人孝子深思父
祖積累之艱勤而有上棟下宇以為安則曰吾祖吾父
之所營構也食而有左餐右粥以為養則曰吾祖吾父

之所蓄畬也以至仕而祿食有章身之榮車馬之奉則
又慨嘆而永懷曰吾祖吾父積仁累善乃弗得食其報
其報乃在我吾何修而有此乎歲孟春率宗族拜省世
墓徘徊顧瞻而不能去尊者老者貴者視其幼者孤者
貧不能自存者惻然興嘆曰爾曹皆吾皇始祖一氣之
所分也皇祖積慶以逮後嗣吾獨享其成而不能分其
惠以及宗黨吾所內愧而不遑安也繼自今仕而有祿
食者居而有餘財者各分其有餘以逮其不足喪未舉

者衆共舉之男未室女未家者衆協以力成之老而無
以為養病而無以為藥則為居廬以收恤之俾吾祖之
德澤均逮後人夫然後有以見松楸而無餘憾矣衆皆
曰善遂為約以倡之凡族大而子孫衆多者推一人為
約主期以十年買田為庄名之曰義庄漸而益之庄成
則鰥寡孤獨廢疾者皆有以為養無散而之四方淪而
事他業者矣倡斯義者先正范公天下第一流人也現
約至今具存海內視以為則古瀛王君成之聚族交河

百有餘年中更喪亂屋廬毀焉惟成之先隱君所居歸
然獨存其地近於祖墓自成之晉登膺仕每歸必會族
省掃退而序拜斯堂思與父祖弟姪共大廈之覆以推
廣前人遺後之澤且將創立義庄如范氏之約屬余為
之記之余惟世倫俗數人有同室藩牆共居越秦憂患
吉凶不相收恤者而成之拳拳葛藟之情以睦族為急
先務求之當世能幾人哉余用是不敢辭然願有以補
義規之所未及夫祖先所以裕及其後者詩書之業義

規既成幸皆可以為養然不可以無教也延致里中宿
儒聚宗族子弟之有志於學者俾之教之各通一經各
為一藝無適他途無營他業也席珍侍聘懷忠信以待
舉可也他年我冠垂紳於朝廷之上以行其所學夫然
後有光祖宗而究顯揚之美流積慶於無窮矣

種德堂記

或曰人有問余者曰積善降祥有德必得其壽信乎否耶
曰自六經聖賢以來有是言矣奚其不信蓋通天地間

惟理與氣而已仁義忠信理之存乎人者也壽考福澤
氣之應乎理者也理行而氣從有必至之應然必為之
力行之勇要其久而後信子不觀之農圃之事乎稻梁
菽蔬所以種之必生生之必遂者理物之常也然有耕
並壞而登耗之弗齊種同時而美惡之或異者氣有厚
薄使之然耳理其常也氣不可常者也理足以主宰是
氣氣惟理之從其不常者皆可常也是故上農老圃之
事其事也惟其理不惟其氣時而耕之時而布之時而

灌之溉之耘之耔之去其稂莠之害苗者夫然後生意
流行無所不及理在是則氣斯應之矣人之有是心猶
物之有其實操存涵養之功則栽培種藝之事也操之
而存養之而不害理之充於我者無不盡則氣之應乎
理者無不周故作善降祥有德得壽有莫知其然而然
者書曰臯陶邁種德德而言種之邁為之力行之勇要
其久而後信云耳余寓河間之中城與李吉甫為隣君
每造其室見其家庭肅雍長幼順承子孫環侍終日無

情容以是敬之退而詢諸鄉黨則知吉甫筮仕四方所至以善狀著聞去而見思其強於為善有自來矣吉甫葺堂既成扁之曰種德中子志遠與余遊從最久求余為發其意前既引稼為喻而意有未能盡者復於此而畢其說蓋士生斯世莫不求為有用種學所以種德也種之身以及於家以及於國是其種工非一朝夕所能致也在易地中生木為升上山有木為漸聖人於升之象而曰君子以順德積小以高大於漸之象而曰君子

以居賢德善俗蓋地中之木由根幹而枝葉寸寸而生以及於丈尋夫然後適於用學者進德之序也山上之木挺特卓立與山體俱高足以風厲於下君子有位之事也積小高大成已也居德善俗成物也皆積而後升漸而後至吾所謂為之力行之勇要其久而後信者也吉甫老成更練諸子森然階庭或以學問自力或以才能奮身他日成就可棟可楹可桷遠到未可量也乃書以勉之

瑞雲寺記

區宇中分而釋氏宗教亦判為南北各師其師各道其道柄鑿冰炭不相為謀百有餘年矣豈期車書混同萬里一轍釋氏宗教因是亦合於一淮浙荆楚有志於訪道者絡繹而此北燕趙齊魏有志於求師者亦振臂而南南北一家佛道祖教由此而中興噫亦盛矣虎巖大長老奮身淮甸踏遍諸方晚歲簡知九重擢主靈隱方丈以當世第一流主東南第一刹南北學徒充溢錫下動

以千數前是百餘年未知有也虎巖不以地位高峻接引忘倦每示衆曰吾老矣汝諸人有疑速問莫待吾影落空山持鐵鋏而問靈骨乃即錢塘之瑞岡介於二峯靈鷲之間度地數頃據山水要會初一招提示為退居之計欲學徒篤志求道惟日孜孜非自成己所以成物也中為大殿外為山門左有僧堂右有香積環以精舍洊被恩命以瑞雲院開山俾其徒甲乙主掌密近靈隱而自為門戶各無相關內外圓成遣一禪人求予作記曰

是吾退居也是吾菟裘也公為我發其意予告之曰進必有退亦物理之常師之道價方隆遽求高退不太早計乎子聞近代尊宿矯世俗興作之弊卜退居於揚子江心者又有卜退居於海門潮上自以為高者予嘗語之曰竒則竒矣而未高也夫居其所當居樂其所可樂何山不可以藏骨至與魚龍爭其洞穴以為退不亦隘乎虎巖之卜瑞雲不幽而深不藏而密樂哉斯丘異乎也人之退居矣吾聖人云居天下之廣居立天下之正

位行天下之大道道之所在即居之所在進一廣居也退一廣居也三千大千世界何往而不可居何山而不可退乎百尺竿頭更宜進步虎巖勉之

寂照關記

真谷居士陳君彥祥早歲周遊中原徧交當世名卿巨儒以至外方博達之士無不就而訪之以道充然若有得也乃歸築室高陽之下父子自為師友名其讀書閣曰寂照予過之間焉曰子為吾聖人學乎亦有取於釋

氏語乎聖人言寂釋氏亦言寂義近而理殊不可以莫之辨也居士請予發其意為之言曰夫心一太極也冲漠無朕者太極之本體也寂然不動者此心之本體也方其冲漠無朕一理混然而動靜互根所以生兩儀四象八卦者舉在是矣方其無思無為寂然不動而道德性命之理所以離為仁義別為五常散為百行萬善者舉在是矣是故未發而寂心體之本然也已發而通心體之妙用也無思非無所思也無為非無所為也其寂

然不動之本體固如是也及夫感而遂通天高地下萬物散殊孰有出於思慮之外者是之謂以一理而貫萬殊羲之畫文之象孔之繫如斯而已矣佛氏則不然其所謂寂即空以為寂心無心也形無形也物無物也以是為體而不能該乎天下事物之理非體也至其動而接乎物境空境也相空相也法空法也以是為用而不能周乎天下事物之理非用也何則寂非空也被視其身與天地萬物等一虛空露電以原其始而莫知所始

金定四庫全書 卷二
夢幻以要其終而莫適所終是之謂以一空而了萬法
體之不能該用之豈能通乎故吾儒異端言寂雖同而
所以為寂則異不辨則不明也或曰若子所言寂之為
感與寂之為照有以異乎曰自此心之本體而言寂而
感者心體之妙用也自學問積功而言寂而照者亦心
體之妙用也子不觀之日乎夕而向晦日之寂也朝而
升乎天衢無容光之不照者向晦之所息也子不觀之
歲乎冬而閉藏者氣之寂也春而陽明發舒萬生被其

光榮者閉藏之所為也人之此心虛靈瑩徹萬善畢備
然非主靜以正其本謹獨以澄其源存誠於幾微毫忽
之間積功於不睹不聞之地何以復此心本體之渾全
輝光日新明明德而靡不周乎故寂照云者學問存養
之功積久而後見非即空以為寂即寂以為明也居士
覃懷人嘗佐大名幕倦遊而歸繪松林秋月為圖著深
衣持麈拂据磐石而坐若思非思其有志於自治其心
者乎其嗣子新篤學好修強毅有守他日必將有用於

世其所涵負殆未可以淺窺也余以羈客來瀛獲交君
父子朝夕所講皆義理之大端故登斯閣喜而為之書

洞霄宮記

道為三極之祖大包宇宙而不見其外細入毫粟而不
見其內生陽生陰神鬼神帝陶鎔千聖橐籥萬象不見
其蹟是故莫大乎天地此道撐拄乎天地莫幽乎山川
此道充塞乎山川道即理理即太極太極本無極撐拄
乎其上無一瞬之或息故曰天柱充塞乎其中無一隙

之不周故曰洞天嗚呼為天柱洞天之說者其知道乎
其至人示以至道之精衆妙之門乎夫天有形道無體
以無攝有誰為之耶天至大洞至小以小納大誰司之
耶天柱即大易統天承天之象老氏天地得一清寧之
旨洞天即大易天在山中之象老氏各得一以盈之意
無疑矣夷攷往牒女媧氏斷鼇足以立四極非鼇也道
也天柱之喻也元始坐浮黎寶珠十方天神悉入其間
何神也道也洞天之喻也餘杭大滌山洞霄宮為三十

六洞天之一與舒州壽陽天柱為三金堂玉室上通太
微竒異神秀不可殫紀漢武立館神歷晉暨唐以至
宋世累朝禮奉深謹代生高人主張斯道咸淳甲戌臘
月不戒於火千礎皆灰會世運更革歸化聖朝山中諸
老合力營之既底于成為力勤矣至元甲申六月鬱攸
洊作一夕復盡四眾還視於邑太息提點宮事一山郎
公如山提舉宮事桂林舒公元一敏毅介特人也不沮
不懼宣言於眾曰吾將新之取木他山運粟他所叶心

集思鳩工度材先建庖帑乃築大殿以及餘屋元貞乙
未之三月壬子告成金碧瑰麗照映林谷神運鬼工殆
不是過朝家欽崇護持視昔有加既成屬余為記余辭
不可已而告之曰洞有天天有柱吾言於前矣天中有
天盡終言之夫天中之天上極無上是為三境境雖三
清則一也又三其為九名雖九清則一也學道之人鍊
陽消陰朝夕存存以我之清同造物之清清乎清乎超
萬形而不壞者乎遂筆之記

序

孝先詩卷序

人之為善迺已分之所當為非有為而為之也如種之必生炊之必熟種者炊者但知其用力之勤而已為之不怠則種者必能生炊者必能熟皆自然之理也于公自謂我治獄多陰德子孫必有興者令高大門閭以需之於異日其言果驗然以己之陰德責報於造物學道君子所不言也余久羈古瀛地與鯨川相接知張氏為

孝弟之門由祖而子而孫傳以孝弟至於孝先不懈愈勤鄉黨稱之士大夫敬之余雖未識其人知之久矣一日見此軸以于公陰德為言余語之曰子之德修之於身行之於家由祖至孫傳之如一日世所為實行不期報於造物而造物之報常在焉所謂孝弟之道通於神明者也而豈世俗陰德陽報者云乎哉中庸曰大德必得其位必得其祿必得其壽此雖為大舜而言然人之有一行之修一事之善莫不能不格而孚不感而應

自然而然者也栽者培之豈不信哉子力行不倦其效有不可得而言者願言勉之

送崔壽之序

余讀詩至鄭風子衿掩卷而嘆曰周之東遷未久學校之廢乃至是乎及觀魯頌之泮水其詩曰魯侯戾立小大從公又曰載色載笑匪怒伊教上以是率其民下以是從其上八章藹然與鄭風我往而彼不來者異矣蓋周公魯公之化在人未泯故其習俗漸漬有以異乎他

邦也河間古文物郡毛公董子之化至今猶有存者士尊名教而貴禮讓遠功利而談詩書出而仕於四方所至皆以興學校崇教化為事然有行之而通者焉亦有率之而不能應感之而未盡孚者焉是則魯鄭比壤而學之興廢不同其俗使然非士君子所病也崔君壽之河間之秀弱冠從其鄉曲老先生講門經義敏而好修有黨里之譽往歲調官安陽始至即延師儒設講席率郡之子弟執經請疑人肅然知有師道學宮久廢墟

為牧場前之仕乎此者莫或過而問之君獨以是為戚
車
函佐其長鳩工度費興頽舉壞闢宮墻拓厦屋像先聖
賢而事之春秋歲祀俎豆具設登降如禮長老預在列
者咨嗟太息不圖盛事復見於今政將成翩彼飛鴉乃
或鳴其不善函委而去之士論共惜壽之則不以是芥
蒂杜門講習忘倦久之乃調廣平之賓幕春仲將發衆
為祖於郭南或舉觴而言曰魯僖之化不可以行於鄭
校泮林詠歌不可以加於城闕子是行欲興學其毋遽

乎余曰不然士之仕也觀其志之所存及其既仕也觀
其政之所先其所先者乃其志之所存也存之於平居
先之於臨事惟學問君子能之不可望此於衆人也壽
之筮仕之始蒞官之初即能以延儒興學為急先務由
其志之所存也在是故其政之所先者亦在是此正壽
之所以卓然過人出處通塞係乎所遭其可以是沮吾
志乎況廣平地大物衆秀民彙興皆有志於道夫豈安
陽可擬余願君舉安陽之已行而行之廣平推安陽之

未及行而究之廣平必致其長於魯僖鄭僑漢文翁之
上使人曰路幕有儒者故路之政事皆出於經美聲洋
溢主賓俱榮不亦善乎若夫治簿書課功程苟逃曠責
刀筆吏類能之不足為君浼也乃書此以餞之

送楊善長序

三代盛時耕於野者為民升於學者為士士者民之秀
傑千百而一二者也故有是士有俊士有造士由俊而
造德成行尊是之謂進士王與二三大臣論其材能而

授之以位公卿大夫由此其選也乃若府史胥徒之屬
則庶人之在官者耳蠲其征輸而役之以事官長所舉
不以薦之于王是烏得與俊造齒哉蓋上之所貴者在士
故天下之士莫不知所以自貴風俗淳厚人才衆多用
此道也降春秋而戰國王者之制日以隳壞而老學宿
儒猶能以道自任不與世變俱遷也當時諸侯大國之
君亦知儒之為貴卑躬盡禮惟恐不能致其肯以待衆
民異術者而待之乎又降而兩漢選舉之制雖與古異

然非經明行修名為儒者不得在高位國之羽儀民之
師表於是乎在其有由他途而進或階曹掾而升不過
職錢穀治簿書試以其所長而止耳自是以來千有餘
年九流名家並馳爭先而聖人之道儒者之教如三辰
麗天清明光潔萬目同仰夫豈以一屈一伸或用或捨
而為晦明軒輕乎道如是教如是儒者之所以為貴亦
如是萬鈞一羽在我而不在物也河間楊善長家世業
儒中間為菽水之養試掾于京俄而風木纏悲以是返

舍既除喪自念祿不逮養乃捨去刀筆之陋復儒冠焉
鄉黨以是賢之一日過余具道所以然之故求一言以
表其向道之夙忱余語之曰人有下喬而入幽者矣子
今捨掾從儒所謂出幽而遷喬子之立志善矣雖然立
志非難而堅志為難余願子持之以靜深要之以悠久
毋勤於榮利毋奪於貧苦毋安於卑近歲通一經以植
其大本聞海內有先覺之士必往請質所疑以定學問
之指歸使在我者充然實有可恃萬鍾軒冕且不足以

累其方寸庶人在官之祿又何足為浼乎

送穆秀之序

周子太極圖義理之宗也邵子先天圖象數之源也二子發前聖未發之蘊海宇所共宗仰人無異辭也而朱漢上易表乃謂穆君伯長得二圖于華山陳希夷氏以太極圖授周子以先天圖授李之才之才傳之邵子則二圖乃伯長所傳于華山翁者漢上之語其徵信乎近世大儒乃謂太極圖周子自得之學似不以漢上之語

為然蓋推尊周邵不欲汨之于異教而伯長付授之功其可沒乎嗟夫長江大河行地萬里以趨於滄海而岷嶓積石乃其發源所自江河之大初不以發源為諱也蓋伯長傳之周邵二先生推而衍之伯長傳其圖二子得其圖外之心由是成通書成皇極經世流行盛大以至於今如長江大河汪洋浩博東注於海而伯長之傳則岷嶓積石之發源有不容廢也穆氏裔孫少見于南方余羈寓古瀛乃得與秀之相識伯長先生之裔孫也

捧憲檄巡行屬郡潔廉自將端靖無擾民譽交歸公退之餘生驛手不釋卷或遇儒生質疑辨惑亶亶不倦其學厥有自來信乎其為伯長之裔孫矣將還求余贈行語余謂秀之子之職業優矣子之才具美矣子之仕進有梯矣余所望于子者修明爾祖之學以顯爾祖之道且以淑爾身使天下之人知太極先天二圖之所自來非吾子之當務乎蓋周子通書邵子經世書觀物等書皆圖^外之心而近代晦庵朱子著太極解義及易啟蒙等書又所以推明周邵二子之學其書浩博不可涯子勉讀之道在是矣

